

Noticia  
Transparente  
di Gobierno

# ISLA ONLINE

Diamars 30 Januari 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



Gabinete Wever-Croes





## RECIENTEMENTE REPRESENTANTENAN DI XAVIER UNIVERSITY SCHOOL OF MEDICINE TAWATA DI BISHITA CERCA PROME MINISTER EVELYN WEVER-CROES Y A DUNA E MANDATARIO UN ACTUALISACION DI E DESAROYONAN NA E UNIVERSIDAD



Xavier University ya pa varios aña ta haciendo inversionnan grandi den nos pais Aruba. Ademas di e edificio di e scol, tambe a traha facilidadnan deportivo, campus y na e momento aki ta trahando riba un auditorium sumamente moderno. E representantenan di e Universidad regularmente ta tene Gobierno na altura di e inversionnan, retonan y logronan y semper a demostra di ta un partner den desaroyo di Aruba den temponan bon y menos bon.

Actualmente Xavier University ta duna dos estudiante Arubiano e posibilidad di studia medicina cu tur gasto cubri pa e Universidad y tambe ta ofrece becanan pa studentenan local. Cu esaki tambe ta brinda mas oportunidad pa nos hobennan studia den nos region.

Tambe a wordo anuncia cu a cuminsa cu e facultad di estudio veterinario y den e cuadro aki e Universidad tin contacto regularmente cu otro ministernan di Gabinete Wever-Croes II.

Prome Minister a gradici e representantenan di Xavier University School of Medicine pa e bishita, pa e confiansa deposita den nos Pais y pa tur e inversionnan cu nan ta haciendo den nos economia y a desea nan hopi exito. ■■■





# PROME MINISTER TA YAMA BON BINI NA MAS DI 30 STUDIANTE DI DIFERENTE PAIS DI EUROPA

## Colegio Arubano ta anfitrión pa e proyecto di Erasmus+ Deplastify The Planet

E siman aki ta e siman di Erasmus+ y Colegio Arubano ta anfitrión pa mas di 30 estudiante di diferente país di Europa entre otro, Belgica, Croacia, Austria, Portugal y España, pa un siman di intercambio pa e proyecto di sostenibilidad, Erasmus + Deplastify The Planet (DTP). Prome Minister Evelyn Wever-Croes diamars 30 di januari mainta, tawata invita pa entrega algun palabra di bon bini na e studentenan di exterior y nan profesornan y tambe a dirigi palabra na studentenan di Colegio Arubano cu ta den e proyecto bunita aki.

E studentenan ya caba pa algun luna ta trahando riba e proyecto aki y e meta ta pa na final presenta un buki den cual nan ta bay enfoca riba e importancia pa baha e uzo di plastic pa asina garantisar sostenibilidad. E problema di plastic ta uno mundial y na Aruba tambe por wak esaki ora di cana na nos costanan. Hopi sushedad ta bin di otro paisnan di cual hopi ta plastic. Y Aruba mester atende cu e problema aki, un compromiso mundial pa baha uzo di plastic pa evita cu e sushi di un país yega na costanan di otro paisnan.

Prome Minister a remarca cu Aruba tawata un di e prome paisnan den nos region cu a introduci e eliminacion di 'single use plastic' y awo ta intensiva e maneho y iniciativanan cu Minister encarga cu medio ambiente Ursell Arends ta trahando riba dje.

Prome Minister a gradici Colegio Arubano pa participa na e proyecto aki e siman aki. "Ta tuma hopi dedicacion, energia y sacrificio pa a logra y mi ta desea nan hopi exito e siman aki", Prome Minister a expresa.

Prome Minister ta gradici tur estudiante di exterior cu ta participando na e proyecto aki y ta desea nan tambe hopi exito y cu nan bay cas cu un bon impresion di Aruba y e maneho cu Gobierno ta hiba riba e tema di sostenibilidad. E mandatario principal di nos país a desea nos studentenan di Aruba tambe hopi exito. "Mustra e studentenan di afo kico tur Aruba ta y mi ta sigur cu ora e proyecto aki caba, boso tambe ta wak atras riba experencianan bunita cu lo keda como bunita recuerdo y mas conocimiento riba e tema presenta", Prome Minister a expresa.

Prome Minister Evelyn Wever-Croes





# Prome Minister Evelyn Wever-Croes: HOLLAND AMERICA LINE CONMEMORANDO 150 AÑA DI EXISTENCIA



Dialuna 29 di januari Prome Minister Evelyn Wever-Croes hunto cu Minister di Turismo Dangui Oduber tawata di bishita riba e barco Rotterdam di Holland America Line cu ta celebrando 150 aña di existencia y di cua pa 65 aña ta bishitando Aruba.

Prome Minister pa e ocasion aki a felicita nan pero primordialmente a gradici nan pa kere den Aruba den bon y den menos bon tempo. Apesar cu e pandemia di covid a afecta e industria crucero enormemente, e mandatario ta

contento di wak cu Aruba por sigui conta cu nan y danki na partners asina Aruba su economia ta recuperando y cada bes ta mas fuerte.

Despues di e ceremonia Prome Minister y Minister di Turismo a haya un recorido masha interesante den e barco y a keda impresiona cu e parti operacional di e barco Rotterdam. E 'waste management' ta wordo maneha pa un "incinerator", cu ta significa cu niun desperdicio ta keda na niun pais, e barco tin un planta di awa y ta procesa su mesun awa parecido na un WEB chikito y nan sistema di coriente, yama "camara di energia", ta uno impresionante.

Rotterdam ta e barco mas nobo di Holland America Line y a wordo construi durante e pandemia y tur barco construi despues lo tin e mesun sistema di waste management, planta di awa y camara di energia. "Mi ta felicita Holland America Line cu nan 150 aña di existencia y sigur pa e 65 aña biniendo Aruba y sperando cu nos por sigui conta riba nan pa hopi aña mas", Prome Minister a expresa. ■









## Minister di Finansa y Cultura Xiomara Maduro: Dia di Betico 2024! UN MAGNIFICO MANIFESTACION CULTURAL NA HONOR DI NOS LIBERTADOR BETICO CROES RIBA DIA DI BETICO

Diaranson anochi 24 di januari a tuma luga riba Plaza Libertador G.F. Betico Croes e Manifestacion Cultural na honor di Nos Libertador Betico Croes. Desde oranan di atardi a inicia cu presentacion di Caha di Orgel "Olga" di Arthur Kelly riba escenario mientras cu riba plaza tabata tin un feria culinario, na unda un cantidad di tent a ofrece e.o. benta di cuminda crioyo, cos dushi y artesanía.

Un rato despues di 8 or di anochi, nos Himno Nacional "Aruba Dushi Tera" a wordo presenta pa Tipico Colegio Arubano forma pa alumnonan bou encargo di Meneer Jadrick Croes. Despues cu maestronan di ceremonia Thessaly Zimmerman y Jonathan Croes a yama bon bini na un y tur na e Manifestacion Cultural organisa pa Comision Celebracion Dianan Nacional, e programa a continua.

Minister di Finanzas y Cultura mr. Xiomara J. Maduro, anfitriona di e manifestacion cultural dedica na "Dia di Betico", a hiba un elocuente discurso na unda e mandatario a refleha un rato riba bida di un gran persona, un gran lider, nos Libertador Betico Croes, e lider stima pa nos pueblo Arubano. Cu danki na Betico su vision, cu curashi, dedicacion y perseverancia, awe Aruba ta un Pais autonomo den Reino Hulandes.

E programa a sigui cu presentacion di Rosea Cultural, cual a baila e wals "Paloma Mensahero".

Tipico Colegio Arubano forma pa studiantenan di varios nacionalidad a continua deleitando e publico cu nan talento presentando varios popular cancion manera e.o. "Dalia", "Madua ban cas'e", "Pilar" y "Baile di Seu". E hobennan artistico di grupo di Baile Baile Popcorn Dancers a presenta e baile 'bishita na Museonan di Aruba".

E siman di Dia di Betico, mandatarionan a bishita diferente scol y di e bishitanan di Minister di Cultura a prepara un video y



a presenta esaki riba pantayanan e anochi y asina un y tur por aprecia local nos scolnan ta haci enconexion cu celebracion di "Dia di Betico". A sigui cu presentacion di grupo Masiduri bao direccion di Vilma Kelly kendenan a presenta nos tradicion di Baile di Cinta.

Pa sera e anochi den forma fenomenal, e maestronan di ceremonia a yama riba escenario pa duna nan concierto dedica na nos Libertador Betico Croes, e Orkesta bou encargo di maestro Dwight Leoneta. E prome presentacion tabata di e gran cantante Jair "Buddy" Versprei cu a interpreta cu su tremendo bos e cancion "Bula bandera", mesora a sigui cu nos strea local Sasha Figueroa cu a interpreta den un forma magnifico e cancion titula "Libertad", otro di nos tremendo voz local cu a presenta na e publico tabata Ruth Gaarie interpretando e cancion "Bo ta curason di bo pais". E anochi a continua cu presentacion di e cancion "Nos Hereo", cual a wordo interpreta pa e talentoso hoben cantante Mitch Almary. E emocion a sigui crece bao di e publico na momento cu Edward van der Biezen a presenta e cancion popular "Pais". Tabata un excelente presentacion di nos talentonan local riba un magnifico escenario y ekipo di sonido instala pa High Performance cu efectonan di luz, color y imagen presenta riba pantayanan.



Yegando na final di e concierto dedica na e Lider stima pa su pueblo, e orkesta a presenta un potpourri carnavalesco interpreta pa nos artistanan Teddy Philips, Freddy “Rasta” Richardson, Roy “Longroy” Illis kendenan a trece un dushi ambiente riba plaza pa un y tur presente por a gosa di dje.

Por ultimo pa sera e anochi a ser presenta un video di coleccion di “Expresionnan Historico di Betico Croes”, na unda esnan presente por a biba e momentonan mas historico di nos Libertador un biaha mas. Esaki sigur ta inspira nos y ta lanta e amor pa nos pais y ta haci nos orguyoso di ta yiu di e tera aki.

Minister di Cultura Xiomara Maduro ta gradici Comision Celebracion Dianan Nacional pa un bunita y magnifico anochi, na unda cu nos artistanan a uni talento y briya riba escenario. Danki na tur artista y musico pa haci e anochi di manifestacion cultural uno espectacular. Na tur dignatario, invitadonan y publico pa honra cu nan presencia y asina por a disfruta di e anochi dedica na Betico. Un biaha mas danki Aruba, danki na un y tur pa duna honor y respet na Betico, e Lider Stima pa su Pueblo. ■■■















## MINISTER ENDY CROES TA FELICITA E GANADONAN DI POWER SOCA 2024



Diadomingo marduga, riba e di dos anochi di e festival, Aruba a conoce su Power Soca King 2024 di Carnaval 70. Un total di 15 banda y 27 cantante a participa den categoria Power Soca. Minister Endy Croes y colega Minister Xiomara Maduro tabata presente na Aruba Carnival Village pa duna sosten y apoyo n'e musiconan y pa engrandecé e festival. Den careda di 3 or di marduga Stichting Musica a anuncia e ganadonan di e anochi. Minister Endy Croes hunto cu colega Minister Xiomara Maduro tabatin e honor pa entrega e premionan n'e ganadonan di Power Soca 2024.

E ganado absoluto di Power Soca 2024 ta Carl Roosberg Jr. (Galloway) di e banda Tsunami. Na di dos lug a resulta

Carl Michael Richardson (M.I. K.E.Y.) di e banda Youth Xtreme y tercer lug a bay pa Bradley Vesprey (Easy B) di e banda Tsunami. E premio di Rookie of the Year a bay pa Agmyr Vesprey (Big Reckless) di e banda Tsunami. Tsunami a bay cu mayoria premio e anochi aki.

Pa conclui, Minister Endy Croes ta felicita Stichting Musica pa organisa Aruba Caiso y Soca Monarch 2024. Alabes e mandatario di Enseñansa y Deporte ta felicita tur musico y cantante cu a briya riba escenario y ta gradicinan pa deleita Pueblo di Aruba cu nan excelente canticanan. Minister Endy Croes ta desea Aruba un dushi temporada di Carnaval 70. Ban celebr'e conscientemente. Pabien na e ganadonan!



# Minister Endy Croes: E DI DIES CONTAINER CU MATERIAL DEPORTIVO A YEGA ARUBA

## A tuma luga un demostracion di uzo di e materialnan na e gymzaal di Scol Basico Washington

Diamars mainta, Minister Endy Croes hunto cu Sport for Children Foundation di Hulanda, Sport for Youth Foundation di Aruba y representenan di diferente schoolbesturen a bishita e gymzaal di Scol Basico Washington. Manera ta conoci, den luna di december e proyecto di renobacion di e gymzaal a keda cla, unda a renoba e vloer, a verf e muraya y a drecha e dak. Recien, di 10 container cu hopi material deportivo a yega Aruba. En conexion cu celebracion aki a invita diferente schoolbesturen, unda cu a duna un demostracion di con pa uza e materialnan. Sport for Youth Foundation di Aruba ta un fundacion cu ta trece diferente material deportivo di segunda mano renoba for di Hulanda pa Aruba. Sports for Children di Hulanda ta haci entrega di e materialnan deportivo di segunda mano ful renoba completamente gratis na Sport for Youth Foundation di Aruba. Unabes cu Sport for Youth Foundation di Aruba ricibi e materialnan aki, ta entrega nan na diferente scol y centro deportivo na Aruba.

Sr. Stefan Groothuis, kende ta gerente di logistica di Sport for Children Foundation na Hulanda a indica cu nan ta busca e materialnan deportivo, drecha nan y haci donacion na e scolnan. Banda di esaki, Sr. Groothuis a indica cu e gymzaal di Scol Basico Washington ta manera un gymzaal mester ta y ta desea di mira mas gymzaal asina na Aruba

Pa conclui, minister di Deporte ta gradici Sport for Children Foundation, Sport for Youth y tur stakeholders cu a percura pa e container y transporte di e materialnan yega Aruba. Tambe, Minister Endy Croes ta gradici Gobierno di Aruba pa contribui pa por a saca e materialnan liber di impuesto. Di e forma aki Ministerio di Deporte ta contribui pa ekipa gymzaal di e scolnan na Aruba cu materialnan deportivo, pa asina e alumnonan por haya les di gymnatiek (gymles) na un forma mas eficiente. Pabien y hopi exito. ■■■





# 2024

## AÑA DI STABILIDAD Y PROSPERIDAD



### Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

